

## 每週經課朗誦經文(巴克禮台語漢字)2013/05/26

### 共同經課 - 1

#### 箴言八章一節～四節，二十二節～三十一節

1 智慧豈無啲叫？聰明豈無出聲？2 伊佇路邊高地的頂面，佇十字路口啲衙，3 佇城門邊，佇城門口，佇城出入的所在，大聲叫講：4 眾人啊，我叫恁，我向世間人出聲。22 佇耶和華造化的起頭，佇極起頭創造的代先，我是伊所有。23 對永遠，對極起頭，未有世界的代先，我已經受設立。24 未有深淵，未有多多水的水泉，已經生我。25 大山未定著，小山未有的代先，已經生我。26 耶和華猶未創造大地及田野，以及地上土粉的原質。27 伊建立諸個天，設圓環佇深淵的頂面。28 頂面安置穹蒼，堅固深淵的水泉，29 給海定著界限，互水無搬(pôa<sup>n</sup>)過伊的命令，定著大地的根基，我及伊佇啲。30 彼時，我佇遐做師傅頭，日日互伊歡喜，常常佇伊面前快樂，31 佇通衙起的地快樂，也及世間人相及歡喜。

### 共同經課 - 2

#### 詩篇八篇

1 [大衛的詩，交互樂官。用迦特的樂器。] 耶和華——阮的主啊，你的名佇全地到即高大！你將你的榮光排設佇天裡。2 你因為你的對敵的緣故，對嬰仔及食奶者的嘴，建立能力，欲互對敵及報冤者靜靜。3 我看你的天你的手所造的，及你所排列的月及星，4 世間人是甚麼，你數念伊？人的子是甚麼，你眷顧伊？5 你互伊比天使厘仔卡輸，閣賞賜伊榮光尊貴做冕旒。6 你設立伊管理你的手所造的，下萬物佇伊的腳下，7 就是一切的羊及牛，山野的走獸，8 天中的鳥、海內的魚，及見若經過海裡的路的，攏下佇伊的腳下。9 耶和華——阮的主啊，你的名佇全地到許高大！

### 共同經課 - 3

#### 羅馬書五章一節～五節

1 所以咱已經對信稱做義，就對咱的主耶穌基督有及上帝和。2 也倚靠伊，對信來入佇現今所帶的恩典，閣向望上帝的榮光來歡歡喜喜。3 毋若按呢，就佇患難也歡歡喜喜；因為知患難生出吞悞，4 吞悞生出老練，老練生出向望；5 也向望無致到見誚，因為上帝的疼對所賞賜咱的聖神來灌沃咱的心。

### 共同經課 - 4

#### 約翰福音十六章十二節～十五節

12 「我猶有多多項欲給恁講，獨獨恁現今當袂起。13 到真理的神來，伊欲導恁入佇一切的真理；因為伊毋是欲憑家己來講，是將伊所欲聽見的來講，閣欲用啲欲來的事報恁。14 伊欲榮光我，因為伊欲對我所有的領受來報恁。15 凡若父所有的，攏是我的；所以我講，伊欲對我所有的領受來報恁。」